



Iesus est Circoncis au huictieme iour, & puis apres presenté au Temple, & receu entre les bras de Simeon, lequel de ioye fait vn Cantique donnant louange à Dieu.

QUAND les iours furent accomplis pour circoncir l'enfant IESVS, ainsi nommé par l'Ange, deuant qu'il fut conçu au ventre ; & que les iours de la purgation de la Vierge Marie furent aussi accomplis selon la Loy de Moysé, ils le porterent en Ierusalem pour le presenter au Seigneur, comme il est écrit en la Loy, Que tout masle qui ouurira la matrice sera appelé le Sainct du Seigneur, & pour l'oblation seroit offert vn couple de Tourterelles ou Pigeonneaux. Simeon homme iuste & craignant Dieu, attendant la consolation d'Israël, estant inspiré du Sainct Esprit, vint au Temple, & prit l'enfant entre ses bras, & loüa Dieu, disant ; Seigneur, tu laisses aller maintenant ton seruiteur en paix : & Ioseph & la Mere de Iesus estoient émerueillés des choses qui estoient dites de luy. Et Simeon les benist, & dist à Marie Mere de l'enfant ; Voicy, cestuy-cy est mis pour ruine, & pour restauration de plusieurs en Israël. C'est vn signe auquel on contredira ; mesmes vn glaiue persera ta propre ame, afin que les pensées de plusieurs cœurs soient reuelées & manifestées.